

ՏԵՂԱՓՈԽՄԱՆ ՄՈՌԱՑՎԱԾ ՁԵՎԵՐ

Վ. Հ. ԲԴՈՅԱՆ

Պատմական գիտությունների դոկտոր

Հայկական լեռնաշխարհում տեղափոխման միջոցները նույնքան բազմազան են եղել, որքան բարդ ու ալյազան են նրա աշխարհագրական պայմանները: Այդ միջոցների մեծ մասը հնադարյան ժամանակներից հասել է մինչև XX դ. սկիզբը. դրանց վերապրուկները հարատևում են նաև այժմ. Բայց տեղափոխման տեխնիկայի մի մասը, որ վերաբերում է մեծ ծանրությունների փոխադրմանը, գոականության մեջ կամ իսպառ չի արտադրվել և կամ աննշան տեղ է գտել: Այդպիսի ծանրություններից են՝ չրաղացի ու ձիթահանի քարերը, ձիթահանի (մի տեսակի) մամիչ գերանները, եկեղեցիների և գերդաստանական մեծ գոմերի հեծանները, շինությունների հիմքերում և պատերում զետեղվող մեծածավալ քարերը, շիրմաքարերը, խաչքարերը և այլն: Տեխնիկայի պատմությանը քիչ բան է հայտնի, թե մասնավորապես սալուղիներ չունեցող Սյունիքում, Հայկական Տավրոսում և դրանց հարակից շրջաններում ինչպե՞ս են տեղափոխվել մեծ ծավալի հասնող ծանրությունները:

Այդ հարցերին է նվիրված ներկա հոդվածը, որի վերաբերյալ ազդագրական տվյալներ ենք հավաքել: 1950—1960-ական թվականներին: Դիտենք, սակայն, որ այդ նյութերը սակավ են, երբեմն պակասավոր, թեև մեծարժեք: Պատճառն այն է, որ բանահավաքումն ուշացած է: Այժմ հազվագյուտ են այն մարդիկ, որոնք տեղափոխման հնագույն ձևերի վերաբերյալ հիշողություններ են պահել: Այդ տեղեկությունները մեծ մասամբ քաղված են Աղձնիքի քնիկներից, որոնք 1910—1920-ական թվականներին վերահաստատվել են Թալինի ու Աշտարակի շրջաններում, Արաբատյան հովտում և այլուր¹: Մասնաւի, բայց արժեքավոր տեղեկություններ ենք չաղել Սյունիքի որոշ վայրերից, Տավուշից և Նախիջևանի լեռնային մասերից, ինչպես և առանձին ուսումնասիրություններից²:

Գերաաւատարկությունը ներկայումս իրացվում է մեքենաներով և այլ միջոցներով, որոնց նախորդել են անանիվ և անիվավոր հին փոխադրամիջոց-

1 Աղձնիքի Սասուն գավառի տվյալների առաջին տեղեկությունները հաղորդել է բանասաց նղաաղար Կարապետյանը, որը դեռևս 1950-ական թվականներին նկարագրել է չրաղացաքարեր տեղափոխելու տեխնիկան: Նա հետազայում այդ հարցերն արծարծեց իր «Սասուն» գրքում (Երևան, 1962), իսկ գերանատարության վերաբերյալ առաջին տեղեկություններն ստացել ենք Ռշտունիքից Կարդենիս տեղափոխված քնիկներից, 1961 թ.: Այնուհետև քարատարության վերաբերյալ տվյալներ են հավաքվել բաղնջիներից, խութեցիներից և ուրիշներից:

2 1968 թ. պետական համալսարանի պատմության ֆակուլտետի ուսանող Թ. Մնջոյանին (Սասունից) հանձնարարեցինք գրել զիպլոմային աշխատանք «Սասունի փոխադրամիջոցները» թեմայով: Թ. Մնջոյանը հորից (այժմ հանգուցյալ) և ուրիշներից հավաքած նյութերի մեծ ուշագրավ տեղեկություններ էր զետեղել նաև գերանատարության ու քարատարության վերաբերյալ, որոնք հետագա լոխացմամբ օգտագործել ենք այստեղ:

ները կամ քաշելով տանելու հղանակները: Իսկ երկրի անհարթ տարածքներում, փողոցաղուրկ բնակավայրերում և այլուր, որտեղ հիշյալ փոխադրամիջոցներով աշխատելն անկարելի էր, գերանը տեղափոխվում էր բռնելով և ուսելով: Մանր գերանները, որոնք օգտագործվում էին ձիթահաններում՝ մամլիչներ և մեծ շինություններում՝ հեծաններ, տեղափոխվում էին 2—3 տասնյակ մարդկանց միջոցով, յուրաքանչյուրի համար նախատեսվելով 3—5 փութ բեռ: Ձեռքով բռնելու կամ ուսելու համար ըստ տանող զույգերի կամ քառյակների թվի գերանի վրա խաչաձև ձողեր էին կապվում: Ընդ որում՝ ձեռքերով բռնած տանողների համար մի ձող էր կապվում, որպիսի ձևը մինչև XX դ. սկիզբը պահպանվել էր Աշտարակի գյուղերում: Այստեղ և այլուր գերանի հաստ ծայրը բռնում էին երկարահասակները, բարակ ծայրը՝ կարճահասակները (նկ. 1)³:



Նկ. 1. Գերանատարությունը Աշտարակում: (Այս և մյուս գրչանկարները մեր վերականգնումների հիման վրա կատարել է Գաբրիել Շիրինյանը):

Օրդուբադի շրջանի Ռամիս լեռնային գյուղում ճիշտ այդպիսի ձողերով գերանը տանում էին նաև ուսելով⁴: Ավելի ստույգ, ձողը նստում էր ծոծրակամասի վրա, որը ցավ էր առաջացնում⁵: Տանողների թիվը որոշվում էր գերանի մեծությամբ՝ մեկ բեռը 3—4 փթից ոչ ավել:


Մեծ գերանն ուսով տեղափոխելու ավելի կատարյալ հղանակը պահպանված էր Աղձնիքի լեռնային մասերում: Այստեղ 8—10 մ երկարության գերանի վրա խաչաձև ձողեր էին կապում, ինչպես Աշտարակում և Օրդուբադում: Ապա սրանց վրա դարձյալ խաչաձև, գերանին զուգահեռ նոր ձողեր էին կապում, որոնք լիովին հնարավորություն էին ընձեռում գերանն ուսած ուղիղ

³ Պետք է ենթադրել, որ ձեռքով տարվող հաստ գերանի բռնաձողերը տակից կկապվեին այն դեպքում, երբ վրայից կապելիս վերցնողներն այն գետնից բարձր պահել էին կարողանում: Այս պարագայում անհրաժեշտորեն պետք է առնվազն երկու քառակող փայտով ուղեկցողներ լինեին, որպեսզի հանգստի կամ հերթափոխության դեպքում գերանը հանգչելը դրանց վրա:

⁴ Բանասացը Ռամիս գյուղացի Մկրտիչ Մանասերյանն է, որն այժմ բնակվում է Երևանում:

⁵ Ցավերը մեղմացնելու համար տանողը վզին շորեղեն էր դնում և զույգ ձեռքով բռնելով ճնշումը մեղմացնում:

քալել (նկ. 2), Տանողներին օգնելու և նրանց անվտանգությունն ապահովելու նպատակով գերանի ծայրերին ճոպան էին կապում: Գերանի հաստ ծայրն ուղղում էին առաջ, վերելքի ժամանակ նրա ճոպանից (նկ. 2Ա) զգուշորեն ձգում էին մի խումբ մարդիկ, որպեսզի գերանը պատահաբար ետ չձգվեր և ուսողներին չվնասեր: Գերանի բարակ ծայրին կապած ճոպանից (նկ. 2Բ)



Նկ. 2. Գերանատարություն Աղձնիքում:

մի քանի հոգի ձգելով պահում էին վայրէջքների ժամանակ, որպեսզի հեծանը մարդկանցով չգահավիժեր: Գերանատարության այս ձևը հնարավորություն էր ընձեռում տանել 4—5 փութ բուռ:

Գերանատարության այս դասական եղանակը մեզ բերել է այն համոզման, թե միջնադարում հայերը սեփական ռազմական բաբաններ են ունեցել, որոնցով քանդում էին թշնամիների բերդերն ու պարիսպները: Ինչպես հռոմեացիների համար սաբեյրների պատրաստած խոյահարող երկաթածայր գերանը⁶, հայկական բաբանն էլ կարող էր ունենալ նման երկաթե սուր ծայրակալ, որով ավելի հզորացած գործիքն առավել ուժգնությամբ կքանդեր թշնամու ամրությունները⁷:

Գերանատարությունը հայտնի է նաև քաշելու եղանակով: Ընդ որում՝ մարդկային ուժով քաշելը, որ ամենանախնականներից մեկն էր լինելու, որևէ կերպ չի ավանդված: Վաղնջական շրջաններից սկսած դրան փոխարինել է


⁶ Տե՛ս և հմտ. Պրոկոպիոս Կեսարացի, Երևան, 1967, էջ 262—263, 272:

⁷ Հայ պատմագրության մեջ խոյահարող մեքենաները հայտնի են բաբան, խոյ, էշ, քալիսառ, մաճգողիճ, փիլիկճ, փաղնիկճ անուններով: Բայց այդ մեքենայի տարրերակի ազգային պատկանելությունը հաստատող փաստեր չունենք: Աղձնիքի գերանատարությունը առայժմ միակ փաստն է, որի հետքերով գնալով գուցե մասնագետները նոր տվյալներ գտնենին:

Ուսով տարվող գերանն այդ նպատակին ծառայելու օգտին է խոսում այն ռազմական կարգապահության ոգին, որը նկատվում էր տեղափոխման ժամանակ և որը Աղձնիքի նման մի նահանգում պատմական անցյալի համար ջատ կարևոր էր:

լծկաններով քաշելը: Վերջինս Հայաստանում հարատևում էր մինչև 1950-ական թվականները:

Գերանի տեղափոխման մի այլ ձևն իրացվում էր բալխիրներով. վերջիններիս բարձրում էին մի քանի գերաններ և քաշում 5—6 զույգ լծկաններով (նկ. 3բ), Աննպաստ ճանապարհներին ցամաքի վրա բալխիրն ավելի անվտանգ փոխակրանք էր, որից առավելապես օգտվում էր արևմտահայությունը: Բալխիր-քարքաշներին հետագայում փոխարինել են անիվավոր փոխա-




Նկ. 3ա. Ջրաղացքարը մի գերան-քարքաշով տեղափոխելու եղանակը Օրդու-բաղի Ռամիս գյուղում. բ. Բալխիր՝ ցամաքի վրա գործող սահնակ՝ գերանատարության և քաքատարության համար:

դրամիջոցները: Վերջիններս անցյալում երկանիվ և քառանիվ սայլատեսակներն էին, որոնցով գերան տեղափոխելու եղանակները հարատևեցին մինչև տեխնիկայի լայն տարածումը:

Որոշ պարագաներում գերանատարության համար ոչ թե սայլը, այլ նրա անիվներն էին օգտագործվում: Արճեշի լեռնային գյուղերում գութանի մեծ անիվի մեծությամբ երկու գերանատար ակներ էին շինում, գերանի հաստ ծայրը դնում էին կարճ սոնու վրա, կապում և եզներով քաշում, փայտի բարակ ծայրը քաշան էր գնում (նկ. 4բ): Ապարանում XX դ. սկզբներին պահպանված էր երկանիվ սայլի սոնին անիվներով թափքից ազատելու և գերանի

կենտրոնամասի տակը տեղավորելու սովորույթը: Հավասարակշռված գերանը գետնից կտրվում էր և տարվում լծկանով⁸:

Անիվներով գերան տեղափոխելու ավելի հարմար ձևը մի քանի սոնուօգտագործումն էր: Զիթահանի գերաններից յուրաքանչյուրն ունենում էր 20



Նկ. 4 ա. Գերանատարությունը Հարք գավառում, սայլի մի շարք անիվների օգտագործմամբ. բ. Գերանատարությունն Արևելքում. գ. Զրաղացքարի և ձիթահանքարի տեղափոխումը սայլով, Ապարանում:

—100 սմ տրամագիծ⁹, Դրանք անիվներով տեղափոխվում էին մեկական: Այգալիսիների տակը մինչև 5 զույգ անիվ էին զետեղում և շղթաներով ամրացնում: Քաշող ուժերի թիվը հասնում էր 4—6 լծի (նկ. 4ա):


Առավել դժվարությունների հետ էին կապված ջրաղացքարերի, ձիթահանների քարերի, շիրմաքարերի և այլ տեղափոխումների: Սակավ րա-

⁸ Լծելու համար գերանի առջևի ծայրի վերին քթի վրա նեղ կացնով ծակում էին և հաստ փոկից օղակ շինում (որը ցարգ Զավաթում բաժնի է կոչվում):

⁹ Հարք գավառի մոտ Նուշալու գյուղում ձիթահանի մամուղ երեք գերաններից ամեն մեկի հաստութունը մոտ երկուական գիրկ է եղել: Զիթահանատեր Խչեն (Խաչատուր) 1900 թ. դրանք մեկ առ մեկ տեղափոխել է Սարիղամիշից, 5 զույգ անիվների վրա բարձելով և վերելքներում 5 զույգ գոմեշ լծելով (հաղորդեց յոնշալեցի, տեղափոխմանն ականատես Գրիգոր Մանուկյանն՝ էմիգրանտ, 1969 թ.):

ցառությամբ այդ քարերի մեծ մասի հանքավայրերը դժվարամատչելի են եղել: Խոր ձորերից և ժայռոտ լեռներից դրանց տեղափոխումը կատարվում էր տարրեր միջոցներով: Վերջիններից մեկը քարը ուսելով տանելն էր, որը նույնպես նախնականության կնիք է կրում: Զրաղացաքարի անցքի մեջ ամուր սոնի էին մտցնում և յուրաքանչյուր թևի տակ 6—8 մարդ մտնելով դանդաղորեն, համաչափ քայլերով տեղ հասցնում: Տեղափոխման այս ձևը նույնպես դանում ենք Աղձնիքում: Տիգրանակերտի դավառի Մոտկանի շրջանի Թաղիր գյուղում և նրա հարևան բնակավայրերում ուսով քար տեղափոխելու այս եղանակը հարատևում էր մինչև XX դ. սկիզբը (նկ. 5)¹⁰: Այդ նույն ժամանակաշրջանում Գրիգոր Վանցյանը հավաստում էր, թե «Մեղրիում, ուր ճանապարհները վատ են և սալ չի բանում, տան գերանները, ջաղացի և գերեզմանի քարերը գյուղացիք իրանց ուսերով են կրում՝ 30—40 մարդ միաժամանակ»¹¹:

Զրաղացի և ձիթահանի քարերը տեղափոխելու մի այլ ձևն իրացվում էր քարքաշներով: Ամենատարրական քարքաշը պատրաստում էին երկձյուղ հաստ



Նկ. 5. Քարատարությունը Տիգրանակերտում՝ խմբովի ուսելով:

ծառից: Սասունում սրա ձևն արդեն փոքրիկ փոփոխություններ է կրում: 50 սմ բարձրությամբ մի կլոր փայտ, որը կոչվում էր ըմբուկ...: Քարը քարքաշի վրա պառկեցնելու ժամանակ ըմբուկը անցնում էր քարի անցքից դուրս, և քարն այլևս այս ու այն կողմ փախչել չէր կարող: Քարքաշի հաստ գլուխն

¹⁰ Պատմեց Թաղիրցի, այժմ Երևանի բնակիչ Հովհաննես Աբրահամյանը 1969 թ.:

¹¹ Գրիգոր Վանցյան, Նյութեր հայ համայնքի ուսումնասիրության («Մուրճ», 1896, № 1, էջ 91):

Ամենայն հավանականությամբ Մեղրիում ևս ջրաղացաքարը սոնիով էին վերցնում: Բացաված չէ, որ քարը և ջրմաքարը զետեղվեին պատգարականման սարվածքների վրա, որոնցով բեռներն ապահով տեղ կհասցվեին 4 թևերից 1—2 տասնյակ մարդկանց ուսերով:

ունենր կացնի նեղ բերանով փորված մի անցք, որ կոչվում էր թորիծ¹²։ Շղթան բռնում էր թորիծից...»¹³։

Շամշադինի լեռնաշխին գյուղերում ձիթահանի քարը տեղափոխող այգեբրկճյուղ քարշակն ունենում էր 45—50, իսկ ճրուղերը՝ 30—40 սմ հաստությոն։ Քարը դրվում էր ճրուղերին և շղթայով կապվում 4 տեղից։

Նախիջևանի լեռնաշխին գյուղերում իբրև քարքաշ օգտագործվում էր երեսը հարթեցրած և տակը անտաշ, կլորավուն թողած գերանը, որպեսզի շփումը թույլ լիներ։ Սրա առջևի ծայրը, երբ բնական կեռությոնն էր տնենում, տաշելով էին կորացնում։ Քարի անցքի դիմաց գերանի վրա նույն մեծության անցք էին փորում և վերևից այդ երկուսի մեջ պինդ վարսում 250 սմ երկարությոն մի ձող։ Նրա վերին ծայրին կապում էին երկու պարան, որպեսզի ընթացքի ժամանակ կողքերից 5—7-ական մարդիկ բռնելով-ձգելով քարը պահեին հավասարակշռության մեջ (բռնողները նույնքան էլ փոխարինողներն են)։ Կեն մասից լծում էին եզներ և քաշում (նկ. 6ա)։

Վերոհիշյալ Ռամիս գյուղում այս ձևով ջրաղացաքարը բերում էին հեռավոր վայրերից, որը 3—4 օր էր տևում։ Նրանք վերելքներին և հարթ ճանապարհներին լծում էին 16, իսկ վայրէջքներին՝ 4—5 զույգ եղ¹⁴։ Տեղ հասնելիս ջրաղացաքարը իջեցնում էին և ուղղահայաց դիրք տալով կարճ սունի անցկացնում, գրորելով տանում էին, տեղադրում։

Ձիթահանի և ջրաղացի քարեր տանող միջոցներից մեկը ներկայիս Հայաստանի հյուսիսային լեռնա-անտառային շրջաններում եղել է ռալխիր-սահնակը, որին արկղաձև ամուր թափք կցելով՝ լծկաններով տեղափոխում էին նաև խաշքարեր, շիրմաքարեր, որմնաքարեր և այլ ծանր բեռներ։

Նպաստավոր մակերես ունեցող վայրերում ձիթահանի և ջրաղացի քարերի տեղափոխման եղանակներից մեկը գրորելով տանելն էր։ Ամենապարզ ձևը քարին երկաթ ու հաստ սունի անցկացնելն ու գլորելն էր։

Բաղեշի նահանգի Սղերդ գավառի Սղունդ գյուղի բնակիչների¹⁵ հավաստմամբ՝ այդ բնակավայրերից 3 կմ հեռավորության վրա գտնվող հանքավայրերից քարը տեղափոխում էին այսպես. տեղում մշակված քարին հագցրնում էին 6—7 մետրանոց և քարի անցքին համապատասխան հաստության հղկած ամուր փայտ։ Անցքի մեջ սեպեր էին խփում։ Այս հաստ ճոպանները կապում էին սնու երկու ծայրին, որոնցից ձգված պահելու-զսպելու էին 6—8-ական մարդիկ։ Ձգում-զսպումը տեղի էր ունենում վայրէջքներում։ Իսկ սնու երկու թևերից հարթ տեղերում և վերելքներում հրում էին 6—8-ական կտրիճներ։ Հրելիս քարը և սնին պտտվում էին. երկու հոգի էլ հրում էր քարը։ Այդպիսով՝ հրողների թիվը հասնում էր 14—18 հոգու, իսկ զսպողներինը՝ 12—16։ Վերելքներին զսպողները դառնում էին ձգող-քաշողներ։ Նույնքան ձգողներ ու հրողներ հետևում էին աշխատողներին՝ հոգնած պահերին փոխարինե-

¹² Եթե րանները փոխադրելու ժամանակ դրանց գլուխները նույնպես թորիծ էին անում, շղթան անցկացնում միշտ, լծում եզներին ու գետնի վրա քաշ տալով բերում հասցնում տեղս (տե՛ս Եղիազար Կարապետյան, նշվ. աշխ., էջ 53)։


¹³ Նույն տեղում։

¹⁴ Այլ վայրերում էլ երկճյուղ քարշակին գրեթե նույնքան եզներ էին լծում, որոնց թիվը վայրէջքներում պակասում էր։

¹⁵ Մի խումբ պատմողների մեջ աչքի էր ընկնում այժմ Ուլանի բնակիչ Առաքել Գրիգորի Մանուկյանը (ծնվ. 1895 թ.), որը մասնակցել է քարը տեղափոխելուն։

լու համար: Հարկ եղած դեպքերում փոխարինողները օդնում էին հրողներին ու ձգողներին¹⁶:

Ուրֆայի հարթավայրերում ջրաղացաքարերը տեղափոխում էին գլորելով՝ լծկանի և մարդկանց փոխգործողությամբ: Ողորկ և երկար սռնու եր-



Նկ. 6 ա. Գարատարությունը խլաթում. բ. Ջրաղացաքարը սռնիավորելով տեղափոխելու եղանակ Սղերդում. գ. Գարատարությունը Ուրֆայում՝ լծկանների միջոցով. դ. Ձիթահանի քարը սռնիավորելով և լծկանների օգնությամբ տեղափոխելը Գորեխում:

կու կողմերից շղթայի քարշակ էին պատրաստում և լծում: Մի մարդ նստում էր եզների լծին և սռնու թևերից 5—7-ական մարդ քարը պահում էին հավասարակշռության մեջ (նկ. 6գ): Տեղ-տեղ նրանք նաև հրում էին: Իսկ Հրորք գյուղում և սրա նման դարոսփոս բնակավայրերում եզ լծելն արգելվում էր:

¹⁶ Միայն մարդու ուժով քար տեղափոխելու պատճառը լծկանների համար ճանապարհների անմատչելիությունն էր:

քաշելը, հրելը և պարաններով զսպելը խնամքով կատարում էին տասնյակ մարդիկ¹⁷։


Այդ նույն ձևը կիրառվում էր Գորիսում, որտեղ ձիթահանի քարը տեղ հասցնելու համար վերելքներում 40 զույգ եզ էին լծում (նկ. 6դ)։ 1952 թ. գորիսեցի մի խումբ ծերունիներ հավաստում էին, թե այդ 40 զույգ լծերն ունեին իրենց հատուկ կոչումները, որ արդեն մոռացված են։ Պետք է դիտել, որ Արև-վելահայաստանում այս գործի մանրամասնությունները մոռացված լինելով մենք չգիտենք, թե ձիթահանի և ջրաղացի քարերը տեղափոխելիս վայրէջքներում զսպելու ի՞նչ ձևեր կային։ Մի բան հաստատ է, որ առանց այդպիսի հարմարանքի անկարելի էր լանջամասերից ցած իջեցնելը։ Քարը «փախչելիս» կարող էր կործանել թե՛ ամբողջ քաշող ուժերը և թե՛ անձնակազմի շատ անդամներին։

Ձիթահանի և ջրաղացի քարերը գործամբ տեղ հասցնելու մի կատարյալ զարգացած եղանակը պահպանված էր Սասունում։ Այդ դասական ձևը նախորդ նկարագրվածների իսկական սինթեզն էր։ Այդ եղանակը տարվող քարին դադահաձև սարվածքի մեջ առնելն էր՝ ճախարակ անունով, որի նկարագիրը հետևյալն է. «60 սմ երկարությամբ կաղնու մի կլոր փայտ էին շինում ձիշտ գրտնակի ձևով, այն անցկացնում էին քարի բկի մեջ և փայտե սեպերով ամրացնում, որ բոլորովին տեղից չշարժվեր։ Գրտնակի երկու ծայրերը հավասար չափով երկարում էին քարի երկու կողմերի վրա, և քարն իր շուրթի վրա պահվում էր կանգուն դրուժյամբ։ Հինգ մետր երկարությամբ երկու երկար ձող, որոնց կենտրոնում բացվում էին կլոր անցքեր՝ գրտնակի դուրս ընկած ծայրերը միջից անցկացնելու համար, իսկ չորս ծայրերն ունեին դուրս փորված, թեք դրուժյամբ երկարավուն չորս անցք, ջրաղացքարի երկու երեսներից հագցնում էին գրտնակի ծայրերին, բայց այնքան թույլ, որ գրտնակը ծակերի մեջ հանգիստ պատվեր։ Ձողերի ծայրամասերը երկարում էին քարի առջևի առ ետևի կողմի վրա, իսկ քարը մնում էր նրանց մեջտեղում կանգնած, Բացի այդ, կար ուրիշ չորս ձող ևս, որոնց հաստ գլուխները տաշում էին ուրագով, տափակ ծայրերը խաչաձև անցկացնում առաջին փայտերի գլխներին փորված անցքերից և այդ բոլորի գլուխները շղթաներով կապում, ամրացնում իրար։ Վերջին չորս ձողերի ծայրերը, երկուսը՝ քարի աջ կողմից, երկուսը՝ ձախ կողմից, թռչունի թևերի պես տարածվում էին օդի մեջ և այս գործողությամբ ճախարակն արդեն պատրաստ էր։ Գութանի շղթայի մեկ ծայրը փաթաթում ամրացնում էին ճախարակի առջևի մասին, շղթան բաց անում գետնի վրա, 8—10 զույգ եզ լծում շղթային, որ հոտաղները ձեռքերը լուծերի վրա գրած, պատրաստ սպասում էին հրամանի։ Օդում փռված ամեն մի ձողից 5—6 տղամարդ երկու ձեռքով պինդ բռնած ու կուրծքը դեմ տված, երկու կողմերից պահպանում էին հավասարակշռությունը, որ շարժվելիս քարը որևէ կողմի վրա չթեքվեր։ Հրաման էր տրվում... քաշելու։ Հոտաղներն իսկույն ցատկում, նստում էին լուծերի մեջտեղը և միասին ձայն տալիս. եզները օդում էին շղթան ու քարը, հենված 20—30 մարդու թևերի վրա, պոկվում էր տեղից և սայլի անիվի պես գլորվում առաջ։ Ահա այս ձևի ճախարակի միջոցով ջրաղացի քարերը խոր ձորերի միջից բարձրացնում, հանում էին սա-

¹⁷ 1989 թ. սեպտեմբերին Ուլանում հաղորդեցին մի շարք ուրֆագիներ, որոնցից 1895 թ. ծնված հորթքեցի Վարդան Շահբազի Թադևոսյանը մասնակցել է քարատարությանը։

րերի գյուխը և այնտեղից էլ հարթ կամ խորդուրորդ ճանապարհով տանում հասցնում անհրաժեշտ տեղը»¹⁸ (նկ. 7)։

Վերոհիշյալ ձևերի մեջ, սակայն, ապահովության տեսակետից ավելի կատարյալ էր քարերը զույգ անիվ ձևացնելով քաշելը, որ տարածված էր հըլաթում։ Զիթահանի կամ ջրաղացի քարերը զույգ-զույգ ամրացնում էին կլո-



Նկ. 7. Քարատարությունը Սասունում, ճախարակ կոչվող սարվածքի օգնությամբ։

րացրած և հղկած մի սոնու, որ վերջինս պտտվել առեղների վերջածայրերին ամրացված ճաղերի մեջ (նկ. 6ա)¹⁹։ Առեղին հարթ տեղերում լծում էին մի զույգ գոմեշ և 2 զույգ եղ, իսկ վերելքներին՝ ավելի²⁰։

Քարատարության նախնական ձևերից մեկը գրաստով տեղափոխելն էր, որի վերաբերյալ տեղեկությունները հաղորդել են Աղձնիքի տարբեր վայրերի բնակիչները։ Բաղեշի նահանգի խասխեր (խրսխեր) շրջանում վարպետները²¹ ջրաղացաքարը 4 կտորից էին շինում։ Դրանցից երկուսը թեռերի մեջ վետեղելով բարձում էին մի ջորուն (նկ. 8—բ) և երկու ջորիով տեղ հասցնելուց հետո քարի կտորները հմտորեն միացնում, երկու դողով ամրացնում ու գոր-

¹⁸ Ե. Կարապետյան, Նշվ. աշխ., էջ 52—53։

¹⁹ Առեղի այդ քաշող ճաղերի արանքները գոգավոր բարձեր էին դնում, որպեսզի սոնու պտտվելը գյուրանար և առեղածայրերն էլ շփաշվեն։ Ճանապարհին սոնու գործող մասերը և հիշյալ բարձերը քվելուց տաքանում և այրվում էին, ուստի օճառափրփուր էին քսում։

²⁰ 1969 թ. պատմեց խլաթի Տափավան գյուղացի, այժմ էջմիածնարևակ, Հայրապետ Հարությունյանը (ծնվ. 1885 թ.)։

²¹ Ըստ երևի հայտնի քարահանքը, ուր արտադրվում էր ընտիր կարմիր քար, գտնվում էր Գյառա Ատեյի բնակավայրի մոտ, նույնանուն լեռան մեջ։

ծարկում էին²², Սասունի Հազգո գյուղաքաղաքի և նրա շրջակայքի հայերը ջրաղացքարը տեղափոխում էին ամբողջական. համետած երկու շորինների մեջքերին հանգչում էին քարի երկար սունու երկու ծայրերը և կապվում այնպես, որ սունին բոլոր պարագաներում անշարժ լինեն (նկ. 8—ա): Մի շարք մարդիկ կրնակակոխ հետևում էին գրաստներին և հարկ եղած դեպքում օգնում²³:

Այսպիսով՝ այդ տվյալների հիմնական հայրենիքը Հայկական Տավրոսն էր և ապա արդի Հայաստանի հյուսիսային և հյուսիս-արևելյան շրջանները՝ Տավուշը, Լոռին, Զանգեզուրը, Մեղրին և այլն:



Նկ. 8. Ջրաղացի քարի տեղափոխումը շորիններով. ա. Սասունի Հազգո գյուղաքաղաքում. բ. Բաղեշի Պասխեր շրջանում:

Երկրի մյուս բոլոր մասերում գերանատարութունն ու քարատարութունը կատարվել են անիվավոր փոխադրամիջոցներով: Այդպես, օրինակ, Ապարանի շրջանի գյուղերը ջրաղացքարը տեղափոխում էին Զուլֆայից կամ Լոռուց՝ երկանիվ ու քառանիվ եզնասայլերով: Քարի անցքում ամրացնում էին ամուր ու երկար սունի: Սայլի առեղներին այն կետերում, որոնք բեռը հավասարակշիռ պիտի պահեն, դնում էին հաստ բարձեր, իսկ քարի սունու ծայրերը հանգչեցնում էին դրանց վրա և շղթաներով կապկապում:

²² Պատմ. նշված շրջանի բնակիչ, այժմ ուշանցի Ասատուր Պ. Մանուկյանը՝ 1969 թ. սեպտեմբերի 25-ին:

²³ Պատմեց Հազգոցի, ականատես, 1904 թ. ծնված Պողոս Տոնոյի Սարգսյանը 1969 թ. սեպտեմբերի 25-ին, Ուշանում:

Դիտենք, որ շորիններով որմնաքարեր տեղափոխելը շատ գծվարամատչելի տեղերի թվում մասնավորապես հայտնի էր Մեղրիում: Գրաստի համետից կախվում էին նժարածև տախտակները, որոնց վրա դարսվում էին քարերը: Զորիններով, ձիերով և էջերով են տեղափոխվել նաև բարձր լեռների ու բլուրների վրա կառուցված վանքերի մեծ մասի շինաքարերը: Հավանորեն հին ժամանակներում գրաստներին հարմարեցված սարվածքների կողքերը փակ և տակից քաղցվող կափարիչներով են եղել:

Աշտարակցիները նույնպես շրաղացքարը նախիջևանից էին բերում. բառանիվ սալլին այն բարձելու համար վերոհիշյալ ձևով սոնիավորում էին, ապա սալլի ետևի անիվները հանում, քարի սոնին զետեղում կշտանոցների վրա դրված բարձերին, այնուհետև հագցնում անիվները (նույն ձևով էլ իջեցնում էին):

Ինչպես գլորելով, այնպես էլ սալլերով տեղափոխվող քարերը իջեցվում և տեղադրվում էին մի խումբ մարդկանց ձեռքով՝ երբեմն լծակների օգնությամբ: Իսկ գերանները շենքերի վրա էին բարձրացնում պատին թեք դիրքով հենած երկու ալլ գերանների վրայով՝ պարանների օգնությամբ՝ դեպի վեր գլորելով:

Ինչպես ակնհայտ երևում է, գերանատարության ու քարատարության ներկայացված ձևերի կիրառումն առանձին ընտանիքների ուժերից վեր էր: Այդ պատճառով համայնքային փոխօգնության սկզբունքների հիման վրա աշխատուժերի՝ մարդկանց և լծու անասունների անհրաժեշտ համատեղում էր կատարվում: XIX դ. և XX դ. սկզբներին Հայաստանի վերոհիշյալ շրջաններում համայնքային սովորույթները բավական պահպանված լինելով նպաստում էին ծանր փոխադրումները համատեղ կատարելու գործին: Դրանք պահպանված էին պատմա-աշխարհագրական գործոնների աննպաստ պայմանների, ճանապարհների և համապատասխան փոխադրամիջոցների գրեթե իսպառ բացակայության հետևանքով:

Փոխօգնությունը նման պայմաններում հսկայական նշանակություն ունեցավ այն իմաստով, որ մարդկային ուժի միավորումը լրացնում էր հասարակ տեխնիկայի պակասավոր կողմերը: Նախնական կոոպերացիայի այդ կիրառումները տեղի էին ունենում ոչ միայն հազվագյուտ ծանրությունների փոխադրումների ժամանակ, այլև վայնքի բազմաթիվ բնագավառներում. տուն կառուցելիս ազգականների, բարեկամների և հարևանների օգնությունը հետևողական բնույթ ուներ՝ հիմքերը փորելու օրվանից մինչև շենքը ծածկելն ու հարդարելը: Այդ օգնությունն առավել մեծ եռանդով էր կատարվում հասարակական նշանակություն ունեցող շինարարության բնագավառում (շրաղացների, ձիթահանների, դպրոցների, աղբյուր-հուշարձանների, կամուրջների, ճանապարհների, եկեղեցիների ու վանքերի կառուցումները): Քարերի տեղափոխմանը մասնակցող հարևանները ներկայանում էին ռեհնց սալլերով, եղներով և մարդկանցով²⁴, գրում է Գր. Վանցյանը: Վկայակոչելով Իգդիրի սովորույթները, Գր. Վանցյանը գրում է, թե այնտեղ շրաղացի շրի հույնը համայնքն էր մաքրում. օգնության այդ ձևը, որ փառալու էր կոչվում, կատարվում էր ամեն հանդիսով, զուռնայի նվագածությամբ²⁵: Քիչ կարծիք, որ առաջ ո՛չ միայն համայնքը պարտական էր անհատի տունը հողով ծածկել, այլև տուն շինել նորան, ոչ միայն ջաղացի քարը բերելուն օգնել, այլև ջաղաց կառուցել ընդհանուր համայնքի համար, ինչպիսին գոյություն ունի ուսաց մեջ և որպես այժմ կատարվում է Իգդիրում²⁶:

Քարատար և գերանատար խմբերի աշխատանքային ոգևորությունը բարձրացնելու, աշխուժացնելու և հոգնածությունը փարատելու համար կային

24 Գր. Վանցյան, նշվ. աշխ. («Մուրճ», 1896, № 1, էջ 90—91):

25 Նույն տեղում:

26 Նույն տեղում, էջ 94:

մի քանի միջոցներ, Դրանցից մեկը նվազախումբ ունենալն էր: Զուռնայի կամ սրնգի նվագը տեղի էր ունենում ինչպես գործընթացի, այնպես էլ գագարի ժամանակ: Դեռևս անցյալ դարի վերջերին նկատված էր, որ «Համայնական աշխատանքի պայմաններն այն են, որ ըստ մեծի մասին սոքա կատարվում են զուռնայի նվագածությամբ, եթե, իհարկե, հարմարություն կա. դա նպաստում է աշխատողների զվարթությանը և գործի հաջող ու եռանդուն առաջ գնալուն»²⁷:

Գր. Վանցյանի վկայությամբ՝ «Շատ անգամ լծած եզների կամ գոմեշների պոզերից ու ճակատներից և կամ ձիթահանքի ու ջաղացի քարի վրայից կարմիր թաշկինակներ են կախում իբրև դրոշակներ, և եթե աշխատանքին մասնակցողների մեջ լավ խաղ ասող կամ սրախոս մեկը կա..., աշխատանքը ընդունում է մի կատարյալ խնշույթի բնավորություն»²⁸:

Ժողովուրդը տեղ-տեղ այսօր էլ պահպանել է այդ հնամենի սովորությունների մի մասը: Այդ տեսակետից առանձնանում են հատկապես Թալինի և Աշտարակի շրջանների սասունցիները և մասամբ՝ Ախալքալաքի կարնո-հայերը: Ինչպես անցյալում, այժմ էլ գործատիրոջ միակ վարձատրությունը մասնակիցներին կերակրելն է՝ ընտիր կերակուրներով ու խմիչքներով:

НЕКОТОРЫЕ ФОРМЫ ПЕРЕМЕЩЕНИЯ

В. А. БДОЯН

Доктор исторических наук

Резюме

Средства перемещения в Армении были столь же разнообразны, сколь разнообразен был ее рельеф. Перемещения больших тяжестей иллюстрированы в литературе весьма орудно.

Бревна и камни перемещались при помощи вьючных животных: волоком или на двух полозьях. Часто тяжести переносились ручным способом или на плечах.

²⁷ Գր. Վանցյան, նշվ. աշխ., էջ 91:

Միանգամայն հնարավոր է, որ երկարատև աշխատանքի մեկնող անձնակազմի մեջ առկա լինեն նաև ժողովրդական բժիշկը՝ քերծվածքներին դեղ դնելու, կտրվածքները կապելու և այլ նպատակներով (ժողովուրդն այժմ այդ բանը չի հիշում):

²⁸ Նույն տեղում: Հմտ. Շիրակի հետևյալ սովորությունը. գութանավարի «Շ5 օրը լրանալուց հետո, երեկոյան պահուն, հոտաղները աղլուխները ճիպտների ձայրին կապած դրոշակ են անում և ամեն միևը իր հորիքի լծին նստած, ուրախության երգերով զալիս են գլուղ» (Աղ. Մխիթարյան, Փշրանք Շիրակի ամբարներից, «Ճմիխյան ազգագրական ժողովածու», հատոր Ա, 1901, էջ 297):

Կարմիր թաշկինակները դրոշակ դարձնելն ըստ երևույթին աղբրավում էր գործի հաջողությունն և պահովելու կրոնական գաղափարի հետ, որովհետև դա աստծու նվիրական գույնն էր համարվում: